

هناء حواس

لمحات على جبين الوطن

أشعار

صدرت الطبعة الأولى في يولييه 2019

بطاقة الكتاب

عنوان المؤلف	لمحات على جبين الوطن
المؤلف	هناء حواس
التصنيف	أشعار
رقم الإيداع القانوني	13035 - 2019
الترقيم الدولي	978-977-6726-23-9
رقم الإصدار الداخلي	432 الطبعة الأولى يولييه 2019
عدد الصفحات	92 صفحة
المقاسات	20x14
تصميم الغلاف	مؤسسة النيل والفرات

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب أو ترجمته أو الإقتباس منه أو نشره على النت الا بموافقة كتابية وموثقة من المؤلف

مؤسسة النيل والفرات للطبع والنشر والتوزيع

ثورة مصرية تشق إبداعاً على الوطن العربي

رئيس مجلس الإدارة

ناجى عبد المنعم



رخصة مداولة مهنة: 58365 - سجل تجاري: 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 فاكس: 020554372901

البريد الإلكتروني: nagyegy200064@gmail.com

البريد الإلكتروني: alnilwaalfourat@gmail.com

الناشر الرئيسي: د.م.ع. محافظة الشرقية - العاشر من رمضان - مجاورة 13 - امام سنتر المدينة - 304

الإهداء

أهدي اليكي اليوم كلماتي
هل تقبلين مني لمحاتي
يا منية النفس
يا كل خواطري
ان هواكي
تحيا منه حياتي
يا مصر

ظلي اللي محبتوش

كان معدي جنب مني
والتفت ملقتوش
اتسحب احساسني مني
واتمحت كل الوشوش
هو فعلا ولا حلم
ولا صورته بالرتوش
كان معدي اصطدم بي
زلزل الارض اللي تحتي
غصب عني بقيت ببوش
جوه احساسني الفجائي

كان عزائي
ان أنا رفضاه نهائي
ظلي اللي محبتوش

واحنا لسه صغيرين

صورة العيله الكبيره
اللي ع الحيطه القديمه
واحنا لسه صغيرين
لسه فيها قلوبنا لمه
ضمه حب بألف ضمه
وابتسامه ف كل عين
هي نفس الصوره هي
بس دي مش القضيه
القضيه . . . ف السنين
كبرتنا . . . غيرتنا

فرقتنا في كل ناحيه
شفنا روحنا مبعترين
اللي زعلان واللي شارد
واللي مهموم واللي حاقد
واللي من كتر المناهده
خدله ركن من السنين
ليه يا صوره وجعه قلبي
دايسه ليه وتري الحزين
عايزه ليه تحطي النهايه
تجرحي كل البدايه
تبقي ذكراها حزين
فوق حيطان بيتنا القديم

بدور عليكي

وعماله أدور
عليكي ف عنيهم
وعماله أفتش
في كل القلوب
وتايه ألاقي
بدايه لهواهم
وفين اتجاهم
لدرب الهروب
وفين النفوس
اللي مش شايله ريبه
وفين الضمير

اللي معصور ذنوب
يا بلدي اتولدت
وشايل رسالتك
وموشوم باسمك
وعنك ما أتوب
وشايفك في دمه
ترقق عيونهم
من القسوه طله
تضوي الغروب
فسامحي عنادهم
وكوني معادهم
في رجعة بعادهم
يدوب الشحوب

موال

المحترم . . . محترم

تشهد عليه الناس

أفعاله شاهده عليه

مش بس رأي الناس

تلقاه كريحة المسك

في سيرته بين الناس

وصحبته طيبه

وقلبه حته ماس

أما اللي ناقص أدب

وعقله في لسانه

تلقاه مبعتر

ودايس الأصول بمداس

كذاب بيكذب

حتي علي نفسه

عمره ما حس

وعامل أد ايه حساس

رافض يشوف بلوته

من كتر كبر النفس

وغروره من شحطته

دايس أعز الناس

وعجبي

ندي فجري

ولسه حروفي

ساعة الفجر بتندي

كلام وردي

بقول معناه علي قدي

ومين قدي

بيعشق اسمك المضوي

شعاع ذهبي علي فضي

يا ست الحسن ف المواويل

يابلا دي

يا نور السوسنه

الهادي

نجوم الليل
بحبك حب لو طایل
يجيلك ع البساط شایل
نواصي الخير
ويهديكي الأمل والنور
ويعمل في التاريخ تعديل
يصح كل شئ عايب
يرجع نسرنا الغايب
ويعدل كفنا من الميل

رغم أنف الغول

ويوم 6 في اكتوبر

أنا راح اطيير

علي أبعد مدي فيكي

يا دنيتنا وأقول مواويل

أنا العاشق ومين أدي

وحب حبيبتي بيندي

غنا واشعار ولحن جميل

هغني رغم أنف الغول

هناك واقف ومستني

يخش الليل علي أرضي

ومش شايف علي جبيني

ضيا القناديل

لكنه لسه مستني

عيوني تنام

عشان يدخل علي حلمي

يدس كابوسه في الأحلام

ويقهربي

علي وطني

وأعيش تايه

بلا أوطان

لكن هيهات

أنا صاحي

يدوب حزني

في أفراحي

وأحمل همي وجراحي
وأعدي من سواد الليل
وأغني تاني المواويل
وألحن كل يوم غنوه
في حب مصرنا الحلوه
يلف عشقها الدنيا
ويرجعلي
ف وفاء النيل
ببشرة خير وحلم جميل
ويوم 6 في اكتوبر
في عامي الجاي
هطير تاني
وأحكي قصة الحلوه
اللي أسراني

لجیل ماعرفشي قصتها

وكيف المعجزه

حصلت

علي حدودها

وكيف صبرت

وكيف عبرت

وكيف ردت كرامتها

مع التكبير

عيش انسان

عيش انسان أو ما تعيش
ليه تتخفي ف مليون وش
وش الأرنب لما بتهرب
وش التعلب لما تغش
وش غضنفر لما بتنفّر
منفوش زي أكوام القش
وش الديب لو عاوز تغدر
تلقاك ناهش قلبنا نهش
وش الحيه لما بتلبد
سمها يقتل فيك الحس
تصبح صورته لهيكل بشري

من غير روح تتنفس بس

عیش انسان

كما خلقتك ربك

عیش انسان

أو ما تعش

نفسي اشوفك

نفسي أشوفك نجم عالي

ضيه واصل للعلالي

نوره فارد الساحات

نفسي اشوفك قلب طيب

خيره فايض عالقريب

زي شريان الفرات

نفسي اشوفك يا حبيبي

ياللي بوريدك حليبي

قلب احساسه ما مات

بس خايفه من زماني
اللي فارض شكل تاني
من تفاهه وانحطاط
خايفه منه وخايفه منك
خايفه عمرك يجري منك
وانت مش طایل فتات
يا ابني اهرب جوه حضني
نستهجه من البدايه
الحروف الربانيه
بيها نصنع معجزات
وافتكروني بعد مني

وادي قول

كنتي يا أمي

المعلم من سكات

شياطين الانس

والله كلاب وعرفناكم
وف عمق جهنم مثواكم
اخوان الكذب الي وراكوا
عري فضايحكوا وعراكوا
أندال في السر وفي الاعلان
حطمتوا شيطنة الشيطان
شياطين الانس بفخر كمان
ووقود النار عند الديان
من أفسد أو روع انسان
راح تخجل منكم آخراكم
والله كلاب وعرفناكم
ملعونه عقولكم ملعونه

ملیانه سفاهه ورعونه
راق جله وطن راق مکرونه
وڌقون ملزوقه بصابونه
اشکال ممسوخه عرونا
تتحرقوا بكل نیران الکون
انتو وکل خساسة وراکوا
والله کلاب وعرفاکو

الوعد

لما روح ارهابي تطلع
تلقي كل ملامحه نار
العيون الحقد فيها
ووشه كاسيه الغبار
اصله موته مش شويه
عند ربه ده انتحار
يعني كافر والأكاده
عقله كان عقل الحمار
أما اللي بيحمي ناسه
في سبيل الله وحارس
لما يستشهد جماله
فوق جواد الحسن فارس
البشاشه طله منه

وابتسامته طیور نوارس
اسمه طیر فارد جناحه
حوله تتسابق عرایس
من بنات الحور یاربی
توعدوا بأجمل عرایس

حثة الماس اللي عندي

حثة الماس اللي عندي..

من جمالها

نفسي أخببها ..

عن الدنيا بحالها

كل عمري اللي فات ..

عائش يصونها

بس عمري اللي فاضل ..

راح يكفي

انه يحميها

.. ويديها امنها
خايفه من كتر البريق

.. اللي محاطها
من طمع كل النفوس

.. الي شافتها
بس هي برده صلبه
لو يقرب حد يسرق

.. منها ومضه
تجرحه بحدة نصالها

بس هفضل أدعي
في اليوم ألف مره
ان رب الكون يصونها
ألف مره

سيف العدل

وعشماوي هيتقابل بعشماوي
بسيف العدل هيداوي
دموع وجراح
مهو الأول سفير ابليس
علي الدنيا

بيغوي عقول
سذاجتها جهاله .. جهلها دباح
لكن الثاني راح ياخذ
بايده التار يهدي قلوب
علي الشهدا ... صدورهم نار
وطير الحق راح يصدق
وهيرفر في كل براح
وهيداوي نزيف لجراح

احساس غريب

جوايا احساس اغتراب

رافضه القلم

رافضه الورق

رافضه دموعي

فوق هوامش الكتاب

اللي زمان كان الملاذ

كان الأمان من الالم

ومن العذاب

وايه حصل .. ليه المثل

قافل عليا ألف باب

ولا أنا مستسلمه..

ومسلمه ... ومصممه

اصنع من الأوهام ضباب

يمكن أحاول الفرار
واهرب بنفسي من الملل
واكتب معاني مفردتها
من الامل

وأرجع لنفسي
بلا تمرد.. او شجن
وأعالج القلب اللي أنا
ظلماه معايا ... لما حساه انه داب

الثوره قامت علشاني

الثوره قامت علشاني
لما هنا كنت بعاني
عشان أقول اللي في بالي
مخنوقه جوايا حروفي
خايفه تقرب من خوفي
علشان ما يخرج سجاني
سجاني وحش بصوت الغاب
اسود قوي شاهر أنياب
مصاص دما جوا اوطني
وأنا وطني كان نايم مقهور
م الصمت صوته حمم بتثور
بركان بيشعل جوه عقول
صرختها دوت بميداني

وميداني ثاير من يومه
من قبل كامل وعراقي
لحد ثورة يوليو جمال
بدا إيماني بكياني
وكياني شب وشد الحيل
قال للأمل نصنع مجاديف
ونعدي للبر الثاني
والبر كان علي شط قنال
أخدوه صهاينة الاستعمار
بقوة الوحش الجاني
لكن لا ضعف ولا استسلام
ردينا فعل ومش بكلام
عدينا فوق كل الالغام
رجعنا سينا بعون الله
ورفرفت كل أعلامي

لكن نظرة نفس الغول
طمعانه فيها بنفس القول
بلفور وعد وترامب يغول
بسلّاح يفرق بيه ويسود
وأنا قلّمي ثاير ولساني
يقول نخلي الايد واحده
القوه أقوي بالوحده
وايمانا نصره رباني
والله نصره رباني

بكره أحلي

والله بكره هيبقي أحلي
واللي قالوا بكره وحله

محيطين

ده الرسول قال بشروا

ما تنفروا

يا جموع المؤمنين

والبشاره استناره

والتفاؤل عمق فهم

وعمق دين

ياللي فاهمين الوجود

ولفين يعود

عاشين سلام مع نفسكم

ومصدقين

ان اللي فات من عمركم
وان اللي جاي من عمركم
درب قصير في طريق
درب اليقين
عند اله العالمين

قطار الموت

ويا قطر الموت
عمال بتفوت
وبتاخذ أغلي ما ف الدنيا
من غير انذار
ولا تعمل صوت
ولا حتي لحظه تفهمنا
لكن راضيين
لكن حامدين
وبندعي لله يصبرنا
لفراق غاليين
اغلي من العين
كانو نبض القلب

الي كسرنا

لكنه كاس

داير ع الناس

قوينا يارب وصبرنا

وارزقنا رضاك

ويا الغفران

واسترنا .. لما تختارنا

محمد صلاح

قوللي حي على الفلاح
والفلاح معناه نجاح
والنجاح معناه صلاح
لما يرضى الرب عنك
لما يرضى أبوك وأمك
لما كل الناس تحبك
تضمن العيشه البراح
لما تبقي النيه صافيه
والخلق إخلاص وعفه
والعطاء شجره ووارفه
ظل طير فارد جناح
قوللي حي على الفلاح
لما أشوف ابنك يا بلدي

اسمه شمس الصبح بدري
رسمه ع القمر المضوي
والنجوم حواليه بتضوي
والعلم علمك يا بلدي
عامله لطريقه جناح
هو ده محمد صلاح
هو ده محمد صلاح

يا بلادي

يا معلماني اني احب الليل
وأسهر أغني في حبك المواويل
وأقول حكاوي من غناوي النيل
وأرسم علي وش القمر قناديل
تسهر تنور كل لياليكي

فوبيا

عم الحاج أردوغان
السيسى فوبيا عامله جنان
كل مايجي يقول موضوع
تلقى بطولة السيسى تبان
امسك نفسك
اهدى شويه
حقك باين للعميان
كرهك واصل للمتوسط
عكر شطك بالاخوان
الى السيسى الهس بتاعهم
بعد ما حلم كابوسهم نام
بعد ما هد مخطط كامل

من امريكا لحد ايران
اهدى ياعم علينا وروق
بكره هتلبس تاج سلطان
واحنا هنيجي كمان ونزفك
ونلبسك ابيض بالعكس

ونقول حيوا اردوغان
جوه المشفى العقلى الفاره
راح تلقالك أحلى مكان
بس يعينى تنام وهتصحى
عالسيسى فوبيا
فى كل مكان
والله السيسى عمره مهانك
إحنا أدبنا من الرحمن
واللى يحبه إله الناس
تلقى الناس بتحبه كمان

الدستور

الدستور مش نص الاهي
او معمول علشان أشخاص
الأشخاص هتموت وتولي
والي هيبقي قناعة الناس
والفتره الصعبه لبلدنا
محتاجه شوية احساس
محتاجه نقوي بجمعتنا
نتكاتف بس بإخلاص
احنا بفضل الله قربنا
نكسرحاجز أنا وخلاص
نكسر طبع الصمت القاتل

والسلبية وكبر الراس
نملي مساحه جوه قلوبنا
اسمها حب الله والناس
ونعلم أولادنا مبادئ
علشان تقوي ولا تتداس
زي شعوب نسيت أخلاقها
وانتماءتها لوطن انداس
تاھت وسط التوھه الزاحفہ
علي أوطانها بلا حراس
مش راح نبقي في نفس التوھه
احنا حزمنا قرارنا خلاص
ان بلدنا الأول دايما
بعد عبادة رب الناس
أسوہ بحب رسولنا محمد
لما بكي مكة باحساس

دوب روحنا في حب بلادنا

بعد عبادة رب الناس

بعد عبادة رب الناس

عجبي علي عصفور

عجبي علي عصفور
يسبح في بحر النور
يملك ربوع الفضاء
ماخفشي يوم م الليل
قلبه سعادته ورضا
سلطان وعرشه شجر
وكنوزه شمس وقمر
وحدوده كل المدي
سبحانه رب الكون
وله في خلقه شؤون
تسبيحه في الأورده

أمي

خديني تاني لسكتك
ورجعيني لدنيتي
أنا تهت في حدود المدي
وتوهنتي غربتي
ضميني في حضنك أوام
ضميني أمي وتبتي
حضنك لروحي براح كبير
دفؤه يدوب قسوتي
سامحيني تايب م الذنوب
وباب سماحتك خلوتي
ضميني أكثر من زمان
ضميني أمي وتبتي

رحلة الأيام

ورحلتنا مع الأيام
طريق واعر
دموع شاعر
يتترجي لبر أمان
وفين البر يلقانا
وراحة بالنا ناسيانا
وواخذانا لموج غضبان
وموجنا لو هدي شويه
وعدي المركبه الجايه
علي مرسى رضا وأمان
هيلقي البر ألف ممر

وفارد م الأمل ألوان
وتكمل بينا رحلتنا
ونوصل ف المعاد بيتنا
متوجنا رضا الرحمن

لمحه

لما بس ببيجي اسمك
ف الكلام تلمع عيوني
افتكر حيرتي ف بعدك
والحنين اللي في شجوني
ابكي وحدي
غصب عني
واسجن الدمع ف جفوني

عاشقك

ويقولون عنك

ما يقولوه

عاشقك

موشوم على

جبين الزمن وشمك

شایل هواكي

في ثنايا الروح

ماشي كما المجدوب

أنا ف حبك

اسمك علي قصص

التاريخ أمجاد

لو فسروها

يعرفو سرك
والسر جوا
القلب أنا شيله
تراتيل بتضوي
فوق بساط نهرك

نعيق البوم

ومهما عملت يا ريس
ومهما عملت يا حكومه
هيفضل فهمهم اسود
وبرضو هنعق البومه
وهي واكله من خيرها
وشربا الميه من نيلها
وعايشه أمنها وسلامها
وبرضو تقول دي اكذوبه
يا بومه طيري علي سوريا
و لبنان وارجعي ليبيا
وقولي ليا اخبارهم
يا بومه انت مظلومه
لا واخده عيشنا المدعوم

ولا التموين ب خمسة جنيه

ولا الانبويه موجوده

يا بومه قوليلي قصدك ايه

انا عرفاكي من بدري

وخطه سربك المجرى

علي وشوشهم ومرسومه

بسم الحقد يا بومه

ولكن ربنا شايف

ومين اصلي ومين زائف

هينصر حقه علي ارضه

بدعوه ام مكلومه

ولدها مات عشان نحيا

ومصر تفضل الاعلي

عشانها كل شئ بيهون

ماهي القامه والقيمه

تجلي الله علي سينا

ومن يومها
عظيمه مصر وعظيمه
فيا بومه كفايه
نعيق وقولي الحق
بس الحق
لأما تعيشي مكتومه

اخلاقنا من اسلامنا

علشان اخلاقنا ف اسلامنا

مش راح نطلب غير الرحمة

مش راح نشمت زي ما شمتوا

مش راح نفرح زي ما فرحوا

لما استشهدوا اغلي ولادنا

احنا منهجنا من ديننا

من دين الله اللي وجدنا

مش م البنا ولا قطب الموت

من تقوي وسنه لرسولنا

والان ما تجوزشي

سوي الرحمه

زي ما علمنا قرانا

حاله

شتم ضرب قتل حرق
ولسا انسان عل الورق
ملعون لسانه والكلام
ملعون باقرار الخلق
ولما بتلوم حضرته
يقول انا سريع الغضب

انا حالى زى حالكوا

انا حالى زى حالكوا
يمكن اقل منكوا
اعمل جمعيه مره
لجل دخول الدراسه
واعاني الف مره
في ترتيب المعيشه
الدخل هو هو
مش حاسه بانتعاشه
لكن بحمد وبشكر
وبقول انا حالى افضل
يارب ديمها نعمه
وبلدنا تبقي سالمه

ما تبقي زي غيرها
عائشه في حرب وتعاسه

صباحك مصرى

صباحك ده مصري بلون قمحنا
ولون الخضار الي نابت هنا
وشمس النهار الي شايله الامل
عرق من كفاحنا وطول همنا
ولكن املنا في بكره الي جاي
يقينه بشاره وسعد وهنا
يا كل الي قلبه وهن واستكان
واحباطه بيقتل بذور المني
كفايه كفابه معايره بحالنا
هلكنا جدالنا وأد صبرنا
ومن فجر بكره وبعد الصلا
هنبدا عملنا وسام نصرنا

ويا مصر اعهدي باني احبك
وارفع راياتك لمليون سنه

رحلة وجود

كل يوم بيطير حمامنا في السما

راسم وجود

كل يوم بنبص في اربع جهات

نلقي الحدود هي الحدود

نشكر اله العالمين

ويطول خشوعنا في السجود

اصل كان مطلوب ركوعنا

وكسرنا

تغيير نظرنا للصمود

تشويه تاريخنا اللي عبر

كل القيود

بس روح النصر فينا
قوه مخفيه دفينه
لو هتيجي الريح علينا
تلقني ف ايماننا الصمود
حامي الحدود

رسالة موده

سلامي لاهلي وعيلتي الكبيره

سلام الكرم اللي مليون اصاله

تشرق تغرب

تلاقي الشهامه

ولاد العمومه بكل الكنايه

سلامي اليكم في كل مكان

بفيض م الموده وفيض

م النوم

وحب في عمقه فخار واحترام

علي ود خالص لوجه الكريم

وصية تراحم رسولنا الكريم

فيارب وفق خطا الطيبين
وجمع قلوبنا مع المتقين
ولاد العمومه شذا الطيبين

الرجال مش بس مال

الرجال مش بس مال
ياللي عندك بس مال
انت افقر حد عايش
اه يا مسكين السؤال
عبد قلبك للدراهم
لجله بتجادل جدال
لجله تخسر الف صاحب
بس ما تخسر مصاري
حتي لو كانت شمال

لمحه

لمحته راكب حصان
مكتوب علي جبهته
بين العنين رهوان
حالف يعدي المدي
يجمع زهور الندي
لعيونك الغزلان
لجل ما تتبسمي
بعد الي عدي وكان
اصلك حزنتي كثير
في عامك الماضي
وشلتي هم وويل
لزمنا ما هوش راضي
ومهما راح تعلمي

هيصد ويعادي
لكن جواد الامل
هيرود اللي ظلم
ويرده عن قسوته
ويتوبه الماضي

من وحى صورہ

ولسه بسمعك جنبي
تقول همك واقول همي
وتبكي عنيك علي حالي
تطبطب فوق شجن قلبي
تواسي شقايا في الدنيا
وبالاحلام تصبرني
فلا تبعد في يوم عني
ووقت ما ابكي اسمعني
ووقت ما ابكي اسمعني

لما بينادي الاذان
لما بينادي الاذان
القي جوابا سلام
القي نفسي في حته ثانيه
والمكان غير المكان
لما قال الله اكبر
القي شئ جوابا يكبر
شئ منور
زي لؤلؤ جوا كوثر
يا سلام الله اكبر
لما يشهد الشهاده
لا اله الاه عباده
حكمه للعقل ورشاده
بالتفكر والاراده
يلقى وهبه للخلافه

وان كينونته سياده
فوق جميع المخلوقات
لما يذكر الرسول
اد ايه بجماله قول
طهر تقوى رضا قبول
خير خلق الله ينول
التفرد والسياده
حي حي على الصلاه
قوم ولبي قول وراه
حي حي على الصلاه
والصلاه كلمه نجاه
لو تكون خالصه لوجهه
يتوهب معنى السعاده
قوم وحيي على الفلاح
يعني دي درجة نجاح

بعد اخلاصك لربك
ولرسولك الذي حبك
ولصلاتك محو ذنبك
لا اله الاه يعزك
لا اله الا الله
محمد رسول الله

مين هينوح

ايه الي حاصل جوه عمق الروح
احساس رهيب مليون اسي وجروح
مش لقيا من كلماتي ما يوصف
جزعي ولا قادره الم حروف
قلمي ومن المة بيبكي ناس
ماتت ضمائرهم -- ومين هينوح

مش نهايه

في الخساره -- ميت مراره

الف دمعته متكفهاش

بس برضو

مش نهايه

مش هنتعلم بلاش

ايوه احباطنا ملانا

ايوه حزن الدنيا جاش

جوه احساسنا كوانا

نار هزيمة الانكماش

بس بعد العسر يسر

حكمه غاليه مننسهاش

من ميدان القلب

هغزل همومي جوه

طاقة صبر

توب من رضا

بالي يجيبه الرب

هالبس انا توبي

واطوف الكون

انشر غناوي

مليانين بالحب

غناوي تحكي

من الحكاوي الوف

فيها العبر والي

يمس القلب

والقلب عاشق

للوطن بيدوب
بعدد رمال الارض
دايب صب
وصبابه في حب
الوطن مجذوب
هكتب قصايدى
من ميدان القلب

رزق السمك

رزق السمك في الشبك

حاجه تسر العين

تحسه بركه وامل

ودعا من الوالدين

حلال ورزق الحلال

ما اجمله ف العين

ابعت يا بحر الرضا

وفرح الراضيين

المعجزه في نفسنا

ادعي وقول يا معين

يا رب

يا معلماني
يا معلماني الغنا
حتي وانا ببكي
وانا جوه بحر الضنا
غرقان وما بشكي
اخفي اهات حرقتي
عنك وما بحكي
اضحك لوشك
واداري دمعتي بكفي
ومهما اعمل-- يا
روحي -- روعي ماتكفي
ترد لو بس لحظه يا امي
من فضلك
لما تخافي عليا حتي من طرفي
سعاده للابد

بتسودوا ليه الحياه
وتشوهوا صورة البلد
الدنيا دي تعب شقا
من يوم ما ادم اتوجد
مش جيلنا ولا جيلكوا
ولا جيل هيجي بلا كبد
بتختلف بس الظروف
لكن الكبد هو الكبد
فاحذر شيطان الياس
ثورخلي اليقين بالله سند
واعرف بان طريقنا ليه
اخره سعادته للابد

فرحة رمضان

محلا شباب البلد
ووردها النادي
بيغزلوا فرحهم
رمضان ده مش عادي
زينه في كل الطرق
يارب اسعدهم
باركلهم عمرهم
نجح مقاصدهم
واجعل ببركه صيامنا
وقيامنا والتراويح
تحمي بلدنا وولادنا
من هبوب الريح

وتصون يارب وتحمي
كل زرع في ارض
وتحمي جندي مجاهد
يحمي ارض وعرض
يارب اسلامنا سلم
اجعلو وحده
توحد التايهين يعودوا
ايد واحده
الجمع قوه عظيمه
سرها الوحده

توكتوك الحكايات

مين الي قال

ان احنا فى فيينا

وان مصر

اليوم بقت جنه

ازاى وكل الى فات

من سنين خنا

ازاى وكل الوبش

سرقونا فى متعنا

هدموا حيطان البلد

بالزيف على دمغنا

يا كل اخوانا

الشرور تهنا

ذكاء شياطينكم

بنعترف صينا

ايوه ارتبكنا

من الاعيبكم

بس الاله عينه

على حالنا

بيورى كل الناس

طريق النور

والى يشوف
النور هينصرنا
يا صاحب التوكتوك
الغلبان كذبت كثير
لا مصر هى الصومال
بيتا بلا ماوى
ولا هى جنه فيينا
لو هتسمعنا

أنا راضيه

أنا راضيه ومرضيه
بكل شيء تجيبوا يا رب
وعمري ما اعترض
حتي لو الايام
شلتني الصعب
وبدعي اني استقوي
بقربي ليك واحب القرب
واعيش علي سنة الهادي
وافهم منها معني الحب
واتعامل بوسطيه
واعلم ابني عطف ورفق

فلا عصبية في ديني
ولا شدة بقولة كذب
ده اسلامي سلام للكون
مهوش حكر لجماعة وحزب
فيارب هب لنا عقلا
والهمنا رجاح القلب

الشاعرة فى سطور



الاسم / هناء ابراهيم سيد
أحمد حواس

حاصلة على عدة تكريمات من
اتحاد المبدعين العرب واتحاد
الكتاب المصري وشهادات
تقدير من بعض المجلات
الإلكترونية.

صدر لها ديوانين (فضفضة شهيد) و (قصاقيص الوجد)

العنوان / قرية محلة روح .. مركز طنطا .. محافظة الغربية

تليفون / 01066163185 - 01123650602

محتوى الكتاب

2	بطاقة الكتاب
3	إهداء
4	ظلى اللى ماحبيتوش
6	واحنا لسه صغيرين
8	بدور عليكى
10	موال
12	ندى فجرى
14	رغم أنف الغول
18	عيش إنسان
20	نفسى أشوفك
23	شياطين الإنس
25	الوعد
27	حتة ألماس اللى عندى
29	سيف العدل
30	إحساس غريب

32	الثورة قامت علشانى
35	بكره أحلى
37	قطار الموت
39	محمد صلاح
41	يابلادى
42	فوبيا
44	الدستور
47	عجبنى على عصفور
49	رحلة الأيام
51	لمحة
52	عاشقك
54	نعيق البوم
57	أخلاقنا من إسلامنا
59	حالة
60	أنا حالى زى حالكوا
62	صباحك مصرى

64	 رحلة وجود
66	 رسالة مودة
68	 الرجال مش بس مال
69	 لمحة
71	 من وحى صورة
75	 مين هاينوح
76	 مش نهاية
77	 من ميدان القلب
79	 رزق السمك
82	 فرحة رمضان
84	 توكتوك الحكايات
87	 أنا راضية
89	 الشاعرة فى سطور
90	 محتوى الكتاب